

Nzryr-krbz Pol Mz Lr Efiszs Natq Ngr Nzaplxtqngr Mz Nzryr-krbz Pol Mz Lr Efiszs

Aposol Pol yrle letz lc mzli kc tqmnc-ngrde mz presin mrkc Rom. ☆ Yrle mz mzliir yiz 60—62 AD mz nibr nzrmcng mz Jisz. Mzli lc yr-kzpzle letz mz Filimon, lr Kolosia, x lr Filipae. Letz lcng amrlx dzbede esz' kx nzyrng mz presin. Yrbzle letz lc mz kxnzrlxngiting kxtrngiulrJiu kcng tzmncng Provins kc Esia, mz taon kc Efiszs, yc-aepztrpz mz taon kcng Kolosia x Laodisea. Mzli ka mrlcde nzrpipebz kandre kc Trki.

Pol tryrleu letz lc mz nzatubqti-krde drtwr kx vz-rbr, a' mz nzpipx-krbzle da kxmrlzting amrlx kcng tqkam Gct bagu mz nzaxvctr-krbzku mz Mrlxde. Mz nzvz-nqblq-krqu lrpzki rde x nzmncz-krbzku mz zmatq ngrde, zmatq lc ycpxm bagu, murde na-aovxioku alwx x Setzn badr drka' nedeng.

Mrkng Mz Letz Lc

Da kxmrlzting kcng tzvzpxmqng mz nzaxvctr-krbzku mz Kraes. [1:1—2:10]

Kxnzrlxngiting amrlx dzbede kxes' mz nzaxvctr-krbzlr mz Kraes, kxmule-esz' lr Jiu o kxtrngiulrJiu. [2:11—3:21]

Nqm q krdr x nzmnc-krdr natakitrde nzngini-krdr doa neng Gct. [4:1—6:9]

☆ : Aposol 28:30-31

Nayrlqzbzku dalr vea amrlx kcnqg tqkam Gct bagu, murde natu-amqngi-ngrgu, mzli kc tqvecku badr Setzn. [6:10-20]

Pol ayrkrpxle letz lc mz natq ngr nzarlr-lzbqngr. [6:21-24]

Mz letz lc Pol pipx-kzpzle nzymne-ebzpxngr tq mz nzmnc-krqu badr Kraes:

Nigu lrmakxtr nrkrdrdq Kraes x nide nargu. [1:22-23; 4:15-16]

Apuku ma nyz Gct kc tqtr, tqmncpx-ngrm Mqngkrxtr, x Jiszs nide nou rplz kx myatxpx-zlwzbz mz ma lc. [2:21-22]

Jiszs apule ncblo kxyrlz x nigu lrmakxtr apuku olvz rde kc tqmrlzti-zlwzle. [5:23-32]

¹ Ninge Pol kc tqmcpq Gct mz nzngini-krnge aposol ne Mevalu Jiszs. Ryrbo bamu leplz kxnztr neng Gct kcnqg tzmncng Efiszs, x tzvz-nqblq-angidrlr Mevalu Jiszs. ² Krka'-ngrbo mz Gct, Trtegu badr Kxetu rgu Jiszs Kxnzmcpq, kx nakabzlr bamu zmrlz ngrdr kxmyalz x nzmnc-zpwxngr.

Da Kxmrlzting Kcnq Tzvzpxmqng Mz Nzaxvctr-krbzku Mz Kraes

³ Na-awibzku mz Gct, kc tqngi Trte Kxetu rgu Jiszs Kxnzmcpq. Murde mz nzaxvctr-krbzku mz Kraes, Gct kc Heven kapemle bagu da kxmrlzting amrlx elr, mz nzokatr-krde nabzgu mz nzmncngr kxtr. ⁴ Murde mzli kc nrlc trnzwzka-ngrde, mcpxpele nigu mz nzngini-krqu leplz nedeng x mz nzaxvctr-krbzku mz Kraes, murde nanginigu leplz kxnztrng kxnztubqng mz nzobq-krde. ⁵ Mz nivz lrde, pnzpe kai drtwr Gct kx

naotile nigu mz nznngini-krgru doa angidr nedeng mz Jiszs, murde mrlz bz bade. ⁶ X naglqlz-ngrgu nide zmrlz ngrde kxmyalz-esz'ngr, kc tqka-nrbalqmle bagu mz nzaxvctr-krbzle nigu mz Mrlxde Kxnmrlzti. ✧ ⁷ Jiszs xpele nigu mz mepyr ngrde mz nzarlaxp-krde nigu mz zmatq ngr alwx. X dekc tqipqngr Gct nigu mz alwx rgung, mz nzvz-nqblq-krde zmrlz ngrde myalz-esz'ngr. ⁸ X pulio-ebir-ngrmle zmrlz ngrde lc bagu, mz nzvz-nqblq-krde nzetukr nzyrplapx-krde x nzrkrly-krde.

⁹⁻¹⁰ X mzli ka abrtzlvz Gct nzaelwapx-krmle bagu drtwr kxmyapxbz kc tqyrlq-kaile mzli kc bqnc, tqyc-kapqbz mz kxnzung amrlx krlzmle mzli ka. Kraes nide nou drtwr lc x atutrlle. Murde mz nzkrly-krbzle mzli kx mcpx Gct, Gct sa nayrlwr-lxblrle mz dzbede kxes' kxnzung amrlx mrkc Heven x mz nrlc ka, murde namnclybzng mz Kraes kc nangi nardr. ¹¹ X mcpx Gct nigu x yrlq-pnzle drtwr kx nanginigu doa nedeng mz nzaxvctr-krbzku mz Kraes. X Gct batrpzle da amrlx kx prtzm mz nzvz-nqblq-krde nzyrplapx-krde mz drtwr kc tqyrlqle. ¹² Murde nigr lr Jiu, mz nzbrti-kaikr drtwrgr Kraes, nabatrpzkr mz leplz nzglqpx-krdr Gct. ¹³ X nimu kxtrngiul-rjiu nzaxvctrpe-kzpzmu mz Kraes, murde mzli kc tqxlr-ngrnamu natq angidr, sc tqlxngitipe-kzamu Nrpakxmrlz lc. X mz nzbrtikr drtwrmu Kraes nzarlaxp-krde nimu, Gct sc tqyrlqtrpebzle bamu rkx ngr nznngini-krmu leplz nedeng. Krlc Mqngrkxtr kc tqpipx-pnzle kx nakabzle mz leplz nedeng. ¹⁴ Mqngrkxtr apule trau kx nzka kai

✧ **1:6** Matiu 3:17

mz nzaelwapxngr kx sa naka-kzle da amrlx kcnq tquesalz-ngrde. Murde Gct ka-kaipzle Mqn-grkxtr mz nzaelwapx-krde kx sa naka-kzpzle da kxmrlzting amrlx kx nzvzpxmqng mz nznngini-krqu leplz nedeng. Murde naglqpxku nide mz nzmrlzkr nqm q krde.

Pol Krka'-ngrde Lr Efiszs Kxnzrlxngiting

¹⁵⁻¹⁶ Mz nztwz-krqu da kxmrlzting lcnq, sc tqkrka'pe-ngrne nimu, abzo mzli kx xlr x kx brtipe drtwrmu Kxetu rqu, Jiszs Kxnzmcp x mrlztiamu leplz kxnztrng ne Gct amrlx. X awi-zvz-ngrbo mz Gct nimu. ¹⁷ Gct nide Trte Kxetu rqu, Jiszs Kxnzmcp x nqm q krdeng amrlx myapx zlwz. X rlxti-zvzbo mz Gct kx nzyrplapxngr x nzkrlzng kx kabz Mqngrkxtr naetunepx-zvzng mz nabzmu, murde nzkrlz-krmu Gct naetunepx kz. ¹⁸ X nakrlz-kzamu da kxmrlzting kx nakabzle bamu. Murde sa nakabzle da lcnq, tqobqtipxamu, mz nzkqle-krde nimu mz nznngini-krmu leplz nedeng. X krka'-ngrne kx nakrlz-angidramu kx nznngini-krmu leplz nedeng ngi da kxmrlz kxmyapxbz mz nabzde.

¹⁹⁻²⁰ X krka'-ngrne kx naxngi-angidramu zmatq ngrde kxetu-esz'ngr kc tqwz zvz mz nabzgu, mz nznngini-krqu kxnzrlxngiting. Murde mz zmatq kcpwz tqatulz-mou-ngrm Gct Jiszs mz nzbz-krde, x dekcpwz tqawxbuo-ngrmle nide me matq-esz'ngr mz nrlar Gct kxrtc kc Heven. ☆

²¹ X mz nzaclve-krde kc Heven, Jiszs myaszlz-zlwzle kxnzeting amrlx kxmule-esz' mz nrlc ka o mzlilxlr. Myaszlzle nidr mz nzxplr-krde, zmatq

ngrde, zmrlue ngrde, x drtqde, kxmule-esz' mzli ka o mzli kc navzm. *

²² X Gct yrqlqzbzle doa x da amrlx mz zmatq ngr Kraes, ☆ (kxmule-esz' leplz, enjrl, drka', animol, o da kxtrnzluung), mz nzmex-krbzlr bade. ☆ Murde nangingide nar leplz amrlx kcng tzprtrng mz lrmakxtr. ²³ X lrmakxtr lcng nzaesz'tilr nide, murde nide nardr x nidr nrkrdrdqde. X nide kc tqesz'-ngrde da amrlx.

2

Nzlungr Vzpxm Mz Nzaxvctr-krbzku Mz Kraes

¹ A' mzli lc trlxngitikalamu Kraes, mqngmru bz, murde vz-rbr-zvzamu mz nzale-krmu alwx. ² X mzli lcde, apuamu kxnmnc-mrbrng mz nrlc, mz nzvz-nqblq-krmu Setzn, kc tqngi kxetu r drka' amrlx kcng tzmncng mrnyzdr mzlilxlr. X nide kc tqvz zvz nzbatr-krbzle mz leplz nzxpqbrlr-krdr Gct. ³ Mzli lc tqmnc-nqblq-kzkr nqm q nr drtwr kxtrka kcng tqyclzm mz nabzgr, mz nzrtrngzti-zvz-krbzkr da kznikeng mrlzm bagr. Nigr leplz kxdrka'-ngrng mz nzapu-krgr leplz amrlx, x takitrde Gct nzayrplapx-krde nigr mz zngya ngr drtwrde.

* **1:21** 1:18 Kzdung leplz mz drtwrdr natq lc tqmnr-n-grbz natekqtr-kzlr mz nzrpi-krde kx, 'Krka'-ngrne kx nakr-lz-angidramu nzetukr da kxmrlzting kx nakabzle bamu.' 1:21 Mz mzli nyz Pol, leplz nzrpir kx enjrl x drka' nzaclveng badr kxnetu ngr kandre x mztea amrlx. X nzota-etrng mz nztwz-krdr leplz mz nrlarde nyz Gct o Setzn. krkcng tzaovxiolr mrnyzdr batrpzle da mz nrlc ka. Kzdung Kristin nzlxngiti-kzlr drtwr lc, mz nzrlwx-krdr Daniel 4:25 x 10:13. Mc kz Hibru 2:5. ☆ **1:22** Sam 8:6 ☆ **1:22** Sam 110:1

⁴ Kxmule-esz', a' Gct yc zlwz mz drtwrde nigu leplz amrlx, murde aodu-zlwzle nigu. ⁵ Mzli lcde mqngrgu bz mz nzale-zvz-krgru alwx, a' Gct sc tqalupemle mqngrgu mz nzaxvctr-krbzle nigu mz Kraes. Arlapxle nigu mz nzvz-nqblq-krde zmrlz ngrde kxmyalz. ⁶ X mz nzaxvctr-krbzku mz Mevalu Jiszs, Gct atulz-kzple nigu mz nzbzngr, x wxbuo-kzku badr me matq Heven. * ⁷ Alele da lc murde mzli kc navzm na-aelwapx-angidr-ngrbzle nzetukr zmrlz ngrde kxmyalz-esz'ngr, mz da kx mrlzting amrlx kcng nzvzpxmqng mz nzaxvctr-krbzle nigu mz Kraes. ⁸⁻⁹ Murde nzrlapx-krmu vzpxm mz zmrlz ngr Gct kxmyalz, mz nzokatr-krde nimu mz nzabrtr-krbz drtwrmu mz Kraes. A' nzrlapxngr lc trvzpxpuu mz nimu esz'-krmu. A' Gct kx rka-nrbalqzb bamu, murde ma tqglqpx-lzbq-ngrnamu kx wz-ngrnamu da lc mz zmatq ngrmu esz'-krmu. ¹⁰ Gct wz-ngrde nigu mz nzmnc-krgru mz nrlc ka mzli ka. X alule mqngrgu mz nzaxvctr-krbzle nigu mz Mevalu Jiszs. X mzli kc pnz, yrlqle drtwr mz da kxmrlzting kx suti drtwrde nzale-krguleng.

Lr Jiu X KxtrngiulrJiu Nzngini-krdr Dzbede Kx Esz' Mz Kraes

¹¹ Nimu kxtrngiulrJiu nadcpz mz drtwrmu kx mzli kc pnz, nzirpi lr Jiu nimu kxtrnzpakrung, a' nidr kxnzpakrng mz nzvz-nqblq-krdr Loukxtr. Nzirpakrnglr lc dalr nrkrdrdq, a' tr-rngiscu zmatq ngr nztekqtr-krde nabz leplz. ¹² Mzli lcde, nzmnc-krmu trka, murde mnc-rlrubzmu mz

* **2:6** Drtwr lc angidatile mqngr kxnzrlxngiting mzli ka x nrkrdrdqdr kx mrna Heven kalr.

Kraes. X ni-kzpu' lr mrkzbleng murde trpnzngr nzprtr-krmu mz nqvi lr Israel, leplz kcng tqmcpX Gct. X trprtr-kzpwamuu mz Nzesz'tikr Drtwrdr badr. X trpnz-kzngr nzkriz-krmu Gct angidr x drtwrmu kc tqmatxpe nzobqtixngr da. ¹³ A' nimu kcng ena nzmnc-rlrubzng mz Gct, mzli ka vec-aepztrpeme nimu bade, mz mepyr ngr Kraes kc tqyrleo mz nzbz-krde nimu. ¹⁴⁻¹⁵ X Kraes batrpzle nzmnc-lxblr-krgru mz nrwX, nimu kxtrngiulrJiu x nigr lr Jiu. Kzdung natq x nqmq x nzryr-ngrng mz Lou sc Mosis nzapulr drkq kx akixpe nigu x batrpzle nzngyati-lzbqkr drtwrgu. A' Kraes awxole drkq lc, x sc tqmape lou lcng mz nzrlrpx-krbzle nrkrdrdqde nzbz-krde nigu, murde nangingu dzbede kxesZ' kxmRNA mz nzaxvctr-krmle nigu bade. Delc nide nou nrwX ngrgu. ¹⁶ Murde yzlumi-kzpzle nigu mz Gct mz dzbede kc esz' mz nzbz-krde nigu mz kros. X mz nznibqngr Kraes, awxobzle zngya kx yc mz mzlr nigr lr Jiu x nimu kxtrngiulrJiu, murde namnc-zpwx-ngrgu badr Gct. †

¹⁷ Kraes vzm mz nzryapwxtipx-krde lrpzki r nzmnc-zpwxngr badr Gct. Pibzle bamu, nimu

† **2:16** 2:14-15 Mwx Pol rpile 'drkq' mz nzaotikr drtwrde drkq ngr Mangr-nzangiongr Yawe kx akixpe kxtrngiulrJiu mz nzprtr-krdr mrnyz lr Jiu. KxtrngiulrJiu nzkrizlr nzprtr-krdr mrnyz lr Jiu mz nztekqtr-krdr nzrlxngitingr x mz nzngini-krdr lr Jiu mz nzrpakngr. Lou kxnmulr lcng nzakixngr leplz. Kzdg rpile kx nzmu lr Jiu nzmncng badr kxtrngiulrJiu, sa nabatrpzle mz lr Jiu trnztakitrdeu nzprtrngr mz nzangiongr. Mzli lc pnz, pris neng lr Jiu na-ale-zvzng blz, murde Gct naipqpxle alwx ngr leplz nedrng. A' mzli ka, sc tqangidatipe Jiszs lou lcng, mz nzngini-krde Nei sip ne Gct, kc tqngi blz kxrmnr-ngrbz.

kxnmnc-rlrubzng mz Gct, x pi-kzple bagr, nigr kxnmnc-aepztrpzng bade. ☆ 18 Murde mzli ka, mz nzwzkr Kraes, nigu amrlx ngrgu nza-xvctrpzng mz Mqngrkxtr kcpwz, kxmule-esz' lr Jiu o kxtrngiulrJiu, x takitrpegu nztutr-krbzku mz mz Gct Trte. 19 Mz nzmu-krde lcde, nimu kxtrngiulrJiu trpengr nznngini-krmu lrnarnrlc x doa lr mrkzble. Murde mzli ka nipemu lr mztea nyz Gct badr leplz kxnztr nedeng amrlx. X nimu neidu lrde x prtrpe-kzpzmu mz lr ma nyzde. 20-22 X wz-ngrde ma nyzde lc tqtr mz nou rplz kx ngi nzalvztrkr aposol x profet. X Mevalu Jiszs nide rplz lc tqetu tqmyatxpx-zlwzbz, murde nide rplz kc tzatuo kai, tqngi nou bute', x atu-amqngile ma kc. X rplz amrlx ngr ma kc nzaxvctrpzng bade. X apuku rplz lcng tqmwitr lxblr, tqngi drkq ngr ma lc tqtr. X Mqngrkxtr mncpxm elr. ☆

3

Nzwzkr Pol Mz Nzyapwxtipx-krbzle Nrpakxmrlz Mz Leplz KxtrngiulrJiu

1 Mevalu Jiszs yrlqle ninge nzyapwxtipx-krbo Nrpakxmrlz bamu, nimu kxtrngiulrJiu. X dekc tqmnc-ngrne mrka mz presin, murde alex da lc mz nzokatr-krnge nimu. 2 Mwx xlrpeamu kx Gct aprcmle nzwznglr lc bange, murde napipxbo bamu zmrlz ngrde kxmyalz. 3 Krlc da kx yc-kapq pnz kc tqaelwapx-ngrmle bange, da kc tqwai nzyrpe-krbo mz letz ka. 4 Mz nzrlwx-krmu letz lc, nakrlzamu nzaotikr drtwrnge drtwr kc

☆ 2:17 Asaea 57:19 ☆ 2:20-22 Sam 118:22

tqyrlq kai Gct mz nzarlapxng r leplz mz nzbzkr Kraes. ⁵ Murde traelwapx-ngrpwzleu drtwr lcde badr leplz kcng pnz. A' mzli ka, atwzlr-ngrmle Mqngrkxtr mz aposol x profet kxnztr nedeng mz nzaelwapxpe-krbzlele badr.

⁶ Drtwr lcde tqyc-kapq pnz nide sele. Lr Jiu x kxtrngiulrJiu nipedr dzbede kx esz' mz nzlxngiti-krdr Mevalu Jiszs. X nzprtrng rllrdr mz da kxm-rlzting kcng tqesalz-ngrbz Gct kx navzpxmqng mz nzngini-krdr nrkrdrdq Kraes. ⁷ Mz nzvz-nqblq-krde zmrlz ngr Gct kxmyalz, kamle bange zmatq ngrde, murde nawztrpo bade mz nzyapwxtipx-krnge Nrpakxmrlz. ⁸ Kxmule esz' leplz nedeng amrlx nzmyaszpxlr ninge, a' mz zmrlz ngrde kxmyalz rlr-ngrmle bange nzyapwxtipx-krbo mz kxtrngiulrJiu da kxm-rlzting kx twzku mz Kraes, kx trnzkrzlu me yrkrkipxle. *

⁹ X Gct kc tqwz-ngrde doa x da amrlx, yrlq-kaile drtwr mzli kc bqnc x yrlq-kapqle krlzmle mzli ka. X suti drtwrde kx nayokaetipxpebo mz leplz, kx mzli ka sc tqvzpe nzatutr-krde drtwr lc. ¹⁰ X suti kz drtwr Gct kx nigu lr-makxtr na-aelwapx-ngrbzku nzetukr nzyrplapx-krde mz enjrl x drka' kxnznetung kxnzrngiscng zmatq mrnyzdr mzlilxlr. ¹¹ Da lcng tqale Gct mz nzvz-nqblq-krde me pnz drtwrde kx yrlq-pnzle mzli kc trwzka-ngrde nrlc. X mzli ka angidatipeleng mz nzwzkr Mevalu Jiszs, Kxetu rgu. ¹² X mzli ka trmwxlrpekuu nzvz-krbzku mz

* **3:8** Pol rpile kx leplz neng Gct amrlx nzmyaszpxlr nide, murde ngitr-zlwzle nzatrkatikai-krde kxnzlxngitilr Jiszs.

Gct mz nzkrka'ngr. Murde krlzku kx abrtzlvzle nigu mz nzabrtr-krbzku drtwrgu mz Jiszs x nzaxvctr-krbzku bade. ¹³ Mz nzm-krde lcde, bzkq nabzmu talvzo mz nzetqkr drtqnge mz nzyapwxtipx-krbo Nrpakxmrlz bamu, nimu kx-trngiulrJiu. Murde da kx prtzm bange ngi dalr nzokatrngr nimu.

Pol Krka'-ngrde Lr Efiszs

¹⁴ Mz nzaotikr drtwrnge da lcng tqmrlzting, tzvzpxmqng mz nzaxvctr-krbzmu mz Kraes, atuobo zpr mz nzkrka'-krbo mz mz Gct Trtegu. ¹⁵ Murde nide Trte neidu amrlx kx nzmncng Heven x kx nzmncng mrka mz nrlc ka. ¹⁶ Mz da lcng tqmrlzting, rlxibzo bade nzka-krbzle bamu zmatq ngr Mqngrkxtr mz nazplr-krde nimu navzo la mz nabzmu. ¹⁷ Murde namnc zvz mz nabzmu, mz nzbrkr drtwrmu. X krka'-ngrne kx nivz lr Gct nangi dzbr x nou nzmnc-krmu. ¹⁸ Murde mz zmatq ngrde nakrlz-angidramu nzetukr nivz lr Kraes. Murde nzyryz-krde, nzboi-krde, nzvzo-krde, x nzmyalz-krde tqvzpe tqvzpe. ¹⁹ X krka'-ngrne kx sa naxngibzmu nzetukr nivz lrde mz nabzmu, kxmule-esz' trpnzng kxrkrlz angidr. Murde na-aelwapx-zpwx-ngrnamu nivz lrde mz nqm q krmung amrlx.

²⁰⁻²¹ Mzli ka takitnde nzglqlz-krngu Gct. Murde krlzle nzalengr da kx myaszpx-zlvzle da amrlx kx rlxibzku bade x myaszpx-kzle da amrlx kx aoti drtwrgu. X alele da lcng mz zmatq ngr Mqngrkxtr kc tqalu-zvzle nabzgu. Murde nigu lrmakxtr, mz nzaxvctr-krbzku mz Mevalu

Jiszs, na-amrlue-zvzku nide, tqvzpe tqvzpe. Eu, angida.

4

Drtwr Kxnzlxngitilr Kraes Naesz'ti

¹ Lalztqmamu bange. Mncpxmc mz presin murde wztrpo mz Kxetu. Naxplrmibz natqnge mz nzpi-angidr-krbo bamu kx nqm q krmu x nzmnc-krmu natakitrde nzqlekr Gct nimu mz nzngini-krmu doa nedeng. ² Lrpzki kx navz-nqblqamu nide sele. Avzo-lzbqamu. Nanginimu leplz ngr nrwx. X bzkq drtwrmu ngya-anibz mz leplz kx nzatrkatilr nimu. A' mz nivz, rlr-ngrbzmu badr mzli r nztekqtr-krdr nqm nr drtwrdr. ³ Mnc-zvzamu mz nrwx x mz nzesz'tikr drtwrmu mz nzmncz-krbzmu mz Mqngrkxtr. ⁴ Murde nanginigu dzbede kxes' mz da amrlx. Prtrku mz nrkrdrdq kcpwz. Twzku Mqngrkxtr kcpwz. X obqtixku da kxmrlzting kcpwz mz nzqlekr Gct nzngini-rgu leplz nedeng. ⁵ X vz-nqblqku Kxetu kcpwz, mz nzrlxngitingr kcpwz. X mz drtq Gct kc tqngi Trte, Mrlxde, x Mqngrkxtr, prtrku mz nzwrkxtrngr kcpwz. *

⁶ Angioku Gct kcpwz, tqngi Trte leplz amrlx, tqmyaszlze nigu amrlx, tqmncpxm bagu amrlx, x tqmcpxle nigu amrlx mz nzale-rgu nzwz-krde.

⁷ Kxmule-esz', a' Kraes kamle bagu zmatq ngr nzwzngnr kx bletipx-lxblrng mz nzwztr-krbzku bade, mz nzvz-nqblq-krde me pnz drtwrde. ⁸ Da kc tpingr Nzryrngrkxtr le, kx mz nsvdzkr

* **4:5** Mzli kc Pol tqyr-ngrde letz lc, Irmakxtr trpnzngnr nza-kipx-lzbq-krdr mz nzwrkxtrngr.

Kxetu wq aovxiole enqmi kang kqlu. X kabzle da kxmrlzting mz ncblo. ✧ ⁹ Mz nzxlr-krngu natq lc, 'vzdz wq,' nakrlz-kzku kx vzo-kaip yu mz nrlc. ¹⁰ Mrlx kc tqvzom, nide kcpwz tqvzdz wq me matq esz'ngr, murde naesz'-ngrde da amrlx mz nrlc atwrnrngr. ¹¹ Nide kcpwz tqyrlqle leplz mz nzwz-krdr murde na-acivelr lrmakxtr, mz nztwz-krdr nzwzkr aposol, o profet, o kxnzr-lepxng Nrpakxmrlz, o kxnzaclivelr leplz nedeng, o kxnzalvztr-ngrdr natqde, ¹² mz nzoliqti-krdr leplz neng Gct murde nawztrpzng bade. X mz nzwz-krdr lcng, sa na-axplrlr leplz kcng tqngi nrkrdrdq Kraes, ¹³ vz vz mzli kx drtwrgu esz'ti mz nzlxngiti-krngu Mrlx Gct x nzkrlz-krngu nide. Murde nzmnc-krngu badr nabr x na-apupwzku Kraes mz nqmqq krgu amrlx. ¹⁴ Mzli lcpe nzmnc-krngu trapupeleu doa kxnztopwzng kx nztekqtr-ebir-ngrdr drtwrdr apule drtwrdr lcng tqtwzne nrc. Doa lcng tztwzlr nzalvztrngr kzbleng mzli kznikeng nzxlr-ngrdrle, apule da kx tqtwzne nenq. A' trapupekuu nidr, murde mzli ka rblxbz mz kxnzalvztr-rbrng nzesabrti-krdr nigu murde mc-zpwxku nzpokia-krdrng. ✧ ¹⁵ X mz nzvz-nqblq-krngu nivz angidr, napipx-etrku nzalvztr-ngrng angidr, murde naetunepx-zvzku mz da amrlx mz nzapu-krngu Kraes kc tqngi nargu. ¹⁶ X mz nzngini-krde nargu, amwitr-lxblrle leplz nedeng mz nrkrdrdqde, apule neli kxetu kc tqaxvctrle mrkcng kqlu mz nrkrdrdq ncblo. Murde mzli kc doa kxesz' tqale-zpwx-ngrde nzwz-krde mz nzvz-nqblq-krde nivz lr Gct,

doa lc aetunepxle nzxplr-krngu, nigu amrlx mz nrkrdrdq Kraes.

Nqmq Kr Leplz Neng Gct

¹⁷ Mz nzm-krde lcde, pibo bamu mz drdq Kxetu rgu x mz nzngini-krnge aposol nede, kx bzkq apupeamu kxtrnzrlxngitiung, murde nzaoti zvz drtwrdr da kxmane x trpnzng nrade. †

¹⁸ Rblxbz badr nzkriz-zpwx-krdr nzalvztrngr angidr, murde nqmq nr drtwrdr lc tqvz-rbr akamrbr-ngrde da mz nabzdr. X nzpxtpx-ngrdr nzlukr Gct kxmrna murde nardr mqngi x trnzkrizlru nqmq krde. ¹⁹ Trnzclupeung mz da kx myangr drdq, mz nzlrpx-lzbq-krdr nzvz-nqblq-zvz-krdr da kx mrlzbz mz nrkrdrdqdr. X nzamqmiti-rbrlr nrkrdrdqdr mz nzrmwimi-abean-krdr leplz kx trngiu krnalzdr. X drtwrdr tresapxu mz nzale-rbr-krdr da lcng.

²⁰ A' nimu, trngiu da kx nzalvztr-ngrmu lc, mzli kc kai tqxlr-ngrnamu Nrpa ngr Kraes. ²¹ Murde mzli lc tqxlrpe-ngrnamu kx nzmnc-krmu navz-nqblq-zvzle natq angidr kc tqalvztrngr Jiszs. ²² Rpile kx na-axtxpeamu nqmq kcng pnz tqvz-nqblqamu mzli kc trkrizka-ngrnamu Gct. Murde nqmq kxdrka'ngr lcdeng nzatrkatilr drtwrmu x nabzmu. ²³ A' narlr-ngrbzmu mz Gct nzteqtrkrde nimu, murde nanginimu leplz kxmrna kcng nzaokrmu drtwrmu tqmrna kz. ²⁴ X mz zbq kang kqlu narlrpx-lzbq-ngrnamu mz

† **4:17** Kzdung da kxmane nidr seleng: nzangio-krm drka', nzmnc-xgle-krm zmatq ngrm esz'-krm, nzvz-nqblq-krm nqmq kr leplz kx nzrpwa-ngrdr nzwzkr Gct, nzpxtpx-krm natq Gct, x kzdung kz da kxnmulr lcng.

nznngini-krmu leplz kxmrna, murde navz-nqblq-angidramu Gct x nzmnc-krmu natubq zpwx x nalqngi mz nzobq-krde.

²⁵ Mz nzmu-krde lcde, bzkq pokiapebzmu mz kztemung, a' rpi-etramu da angidr. ☆ Murde nigu amrlx ngrgu leplz ngr nrkrdrdq kcpwz.

²⁶ Kzdung zngya ngr drtwr leplz trngiu alwx. A' aclvetio-lzbqm mzli kc tqngyangr drtwrm, ma tqvz-rbrq. ☆ Murde tr-rblxu nzvz-rbrngr mzli kc tqngyangr drtwrm. X bzkq zngya ngr drtwrm boi nzkriz-krbzle nzmwi-krm mz nrlckxbq. ☆ ²⁷ A' ipq ani kztem murde ma tqrlr-ngrbzme mz Setzn nzatrkti-krde nabzm.

²⁸ Mrlx kx pna da, bzkq pnape da. A' nawz-kato mz nzatatr-krmle da kx takitrde nide badr lr ma nyzde, vzmi nzokatr-krde nra-nzlu ngr leplz. ²⁹ Bzkq ycmne-atrkatiamu leplz mz nzrpibqti-krmu x nzrlcbqti-krmu nidr. A' rpi-txpwzmu natq kx takitrde nzaxplr-krde nabz leplz neng Kraes, murde na-amrlz-zvzamu krkcng tzlaltqng. ³⁰ Bzkq avzbzmu drtwr Mqngrkxtr, murde ma tqrbxzbz bade nzokatr-krde nimu. Murde Mqngrkxtr lc tqmncpxm mz nabzmu ngi rkx ngr nznngini-krmu leplz neng Gct. X nzvz-krde nzokatr-krde nimu nakrlzbzle mzli kc Gct na-arlapx-atwrnr-ngrde nimu mz zmatq ngr alwx, mz nzyzlu-krm Jiszs o mz nzbz-krmu.

³¹ Naesakiamu nzntrngz-ngrbz drtwr kxtrka lcde seleng: nzlolvz-amqngi-krmu zngya ngr drtwrmu kx vz nabu, zngya kxetu, nztalwz-krmu, nzpibqti-krmu leplz, x nzmwatikr

drtwrmu leplz. ³² A' nivz lrmu namrlz x naycngr drtwrmu leplz kxnzkxpung x naokatramu nidr. X ipq-lzbbqamu, da kc tqwai Gct mz nzipq-krde nimu mz nzaxvctr-krbzmu mz Kraes.

5

¹ Abzamu nzvz-nqblq-zvz-krmu lrpzki r Gct, murde nimu doa nedeng kcng tqmrlzti-zlwzleng.

² Namrlzti-zvzamu leplz, da kc tqwai Kraes nzmrlzti-krde nigu. Murde rlrpx-lzbbq-ngrde nzbz-krde nigu, mz nzngini-krde blz kx myapx-esz'ngr kx abrtzlvz Gct.

³ X mz nznginipe-krmu lc leplz kxnztrng ne Gct, nzmnc-krmu natubq-zvzpwz, murde ma tzpikitingr leplz nimu nqmq krmu. Bzkq rwmimiamu doa kx trngiu krnalzmu, x bzkq aleamu da kx myangr drtq, x bzkq trkibramu. Murde nqmq kxnzmulr lcng trtakitrpleu leplz nedeng. ⁴ Murde trtakitr-kzdeu nzryapwx-krmu kxtrka. Bzkq yapwxtipxamu be kx amyale drtq. Bzkq ycmne-lukurnr-ngrnamu x rwxwiamu leplz. A' awi-ngrbzmu mz Gct nivz lrde, mz nzymne-krmu amrlx. ⁵ Leplz kcng tzprtrng mz nzmwingr leplz kx trngiu krnalzdrng, x mz nzalengr da kx myangr drtq, x mz nzngini-krdr trkibr, leplz kxnzmulr lcng trnamncung Heven badr Kraes x Gct Trte, x trnatwzlr da kcng tzvzpxmqng mz Gct nzngini-krde King rdr. Murde mz nzale-krdr da lcng trnzangiolru Gct angidr, a' nzangiolr nidr esz'-krdr. ⁶ Bzkq rlr-ngrbzmu mz leplz nzesabrti-krdr nimu, mz nzrpi-krbzlr kx Gct rlrpx-ngrde da lcng tqtrka. Murde natq kxnzmulr lcng nzvz-rbrng. X zngya

ngr drtwr Gct kalr sa natutitrle leplz amrlx kcng tzxpqbrlr-ngrdr natqde. ⁷ Mz nzmu-krde lcde, bzkq prtrpzm badr, a' kapx-lzbq-zvzmamu badr.

⁸ Murde mzli kc ena, apuamu leplz kcng tzmncng mz nzlo, murde alwx ngrmung nzakamrbr-ngrdr da mz nabzmu. A' mzli ka apupeamu leplz kcng tzmncng mz zyzlr, murde da angidr kx vzpxm mz Kxetu pnamilxtipele nabzmu. Mz nzmu-krde lcde, mnc-nqblqamu da angidr lc. ✨

⁹ Murde leplz kcng tzmnc-nqblqlr da angidr lc, nqm q krdr sa namrlz, nalqngi, x natubq. ¹⁰ X abzamu nzkrz-krmu da kx abrtzlvz Kxetu, x vz-nqblqamu me pnz drtwrde. *

¹¹ Kapx-lzbqamu mz da kxmane kcng tqtrka. X pibzmu mz leplz kx da lcng ngi alwx.

¹² Murde myangr drtq leplz nzryapwxtinengr da kx nzrtrngzti-kapqbz leplz kxdrka'-ngrng. ¹³ A' mzli kc alwx kcng tqyc-kapq tzaelwapx-ngrdr, leplz nakrlzlr da kx ngi drka'-ngrng. ¹⁴ Murde da angidr kx vzpxm mz Gct apule zyzlr kc tqaelwapx-ngrde da kxtubq x da kxvz-rbr. Delc, leplz nzngr-ngrdr kx,

“Ei! Melzmq! Bzkq mwibqpeq!

A' tulzm mz nzbzngr mzli ka.

X rlr-ngrbz zyzlr ngr Kraes

Nzpnamilxti-zvz-krde nabzm.” †

¹⁵ Mz nzmu-krde lcde, obq-angidramu mz nzmnc-krmu. Bzkq apuamu ncblo kxngqngu,

✨ **5:8** Asaea 9:1-2 * **5:10** Naglxku nike abrtzlvz Gct mz nzrlwx-krgr Nzryrngrkxtr, murde pipxle da kx mrlzbx bade x da kx trkabz bade. † **5:14** Nabz lc nangr-ngrgu mz #110 'Lod, Glqlzkr' mz Buk R Nzangiongr.

a' na-apuamu ncblo kxyrplapx. ¹⁶ Oliqti-zvzamu nzamrlz-krmu leplz, murde mzli ka leplz kxnzkqlung nzale-tpwzng da kxtrka. ¹⁷ Dekc tqrpi-ngrbo bamu kx bzkq apuamu ncblo kxngqngu, a' abzamu nzkrzl-krmu me pnz drtwr Kxetu.

¹⁸ Bzkq rlr-ngrbzmu mz nzrmnqngr nzatrkatikrde nimu. Murde nzrmnq-katongr rkatrpz mz leplz nzrtrngz-abeane-krdr da kxdrka'ngr kx myangr drtq. A' rlr-ngrbzmu mz Mqngrkxtr nzokatr-krde nimu, murde narkatrpz bamu nzale-krmu da kxtubq. ¹⁹ X mz nzokatrkr Mqn-grkxtr, ycmne-etramu badr kztemung mz natq ngr Sam, him, x nabz kxtrng. ✧ X angrlvzamu Kxetu mz nabzmu atwrnrngr. ²⁰ X awi-zvz-ngrbzmu da amrlx mz Trtegu Gct, mz nzngini-krmu leplz neng Kxetu rgu Jiszs Kxnmcpx.

Olvz Kxnzyrlzng X Ncblo Ngrdrng

²¹ Doa ne Kraes namnclzbz mz zmatq ngr kzt-edeng kxnzrlxngiting mz nzamrlue-krde Kraes. ²² Mz nzm-krde lcde, nimu olvz kxnzyrlzng namnclzbzmu mz zmatq ngr ncblo ngrmung, mz nzmncz-krbzmu mz Kxetu rgu. ²³ Kraes nide nargu kx aclve-angidrlle nigu lrmakxtr mz nzngini-krngu nrkrdrdqde. X nide kc tqarlapxle nigu. Mz nqm q lcpwz, ncblo kxyrlz nangi nar olvz rde mz nzaclve-angidr-krdele. ²⁴ Mz nzm-krde lcde, nimu olvz narlr-lzbq-ngrbzmu mz nzmncz-krbzmu mz ncblo ngrmung, da kc tqwai lrmakxtr nzmncz-krbzlr mz Kraes.

✧ **5:19** Kolosia 3:16

25 X nimu ncblo kxnzyrlzng namrlztiamu olvz ngrmung, da kc tqwai Kraes nzmrlzti-krde lrmakxtr mz nzbz-krdeleng. 26 Bz-ngrde nidr murde na-qlngile nidr mz lue ngr nzwrkxtrngr x mz nzlxngiti-krdr natqde. 27 Murde lrmakxtr sa na-apule olvi kx nayrlzti Kraes kalr. X mzli ka sc tqatubqtile nide, murde natakitrde nide nztutr-krbzle mz mzte, mz nzngini-krde olvi kxluli, kxlqngipx, kxtr, x kxtubq-esz'ngr mz nzobq-krde, kx trtxpnzngr alwx ngrde x trpnzngr da kxvz-rbrtrpz bade. 28 X nimu ncblo namrlztiamu olvz ngrmu da kc tqwai nzmrlzti-krmu nrkrdrtqmu. Murde mz nzmnc-lxblrngr, ncblo kc tqmrlztile olvz rde mrlzti-lzbq kz. 29-30 X trpnzngr kx trkalr-ngrde nrkrdrtqde. A' aclve-angidrle x aputrle dakxnzng, da kc tqwai Kraes nzaclve-krde nigu lrmakxtr, mz nzngini-krngu nrkrdrtqde. 31 Da kc tqwai nzpikr Nzryrngrkxtr le kx, *"Mzli kc ncblo x olvz tzetupe-ngrdr, nayrlzng. X nzamatq-lzbq-krdr namyaszpxle nzamatq-krdr kxnginidrng. X ncblo namnctr-amqngipebz mz olvz rde. Murde doa lcng li nznginipedr nrkrdrtq x leplz kxesz'."* ✧

32 X mz nqmql lcpwz Kraes ncdr lrmakxtr nidr nrkrdrtq x leplz kxesz'. Krlc da kx myapxbz kx trkrlz-angidrkaku. 33 Kxmule-esz', a' ncblo kxyrlz kxesz' namrlztile olvz rde, da kc tqwai nzmrlzti-lzbq-krde. X olvz kxyrlz na-amatqle ncblo ngrde. ‡

✧ 5:31 Nou 2:24; Matiu 19:5; Mak 10:7-8; 1 Korint 6:16 ‡ 5:33 5:25 Nivz lc ngi dalr nzrka-zvzng da, a' trngiu dalr nzrtwz-zvzng da. 5:33 Gct yrlqle nzyrlzng murde ncblo x olvz naokatr-lzbqng mz nzyrlz-krdr.

6

Doa Kxnztopwzng Badr Trtedr X Lxedr

¹ Nimu doa kxnztopwzng, lxngitibzmu natq trtemu badr lxemu, murde axvctr-lzbqpebzmu mz Kxetu x krlc me pnz drtwrde. ²⁻³ Da kc tqwai nzpikr Nzryrngrkxtr le kx, “Amrlue zvz trtem x lxem, murde na-amrlz Gct nim x namnc-zpwxq mz nrlc ka mzli kxboi.” ✧ Krlc lou sc Gct ayrrnrgr kx amnqlzle kc tqvzmi nzesalz-krde.

⁴ A' nimu trte x lxe doa kxnztopwzng, bzkq angyatibzmu drtwr doa nemung. A' aclve-angidramu x alvztr-angidramu nidr, murde navz-nqblqlr me pnz drtwr Kxetu mz nzyrlvzll-krmlr.

Kxnzawzng X Kxnzetu Rdrng

⁵ Nimu kxnzawzng, navz-nqblqamu natq kxnzetu rmung mrka mz nrlc. X navzdzm mz nabzmu atwrnrngr nzamrlue-krmu nidr mz nzamatqngr, na-apule kx wztrpzmu mz Kraes. ⁶ Bzkq wz-angidrtx-ngrpwzmu mzli kx nztulvz-ngrdr nimu kxnzetu rmung, murde naglqlz-ngrdr nimu. A' napq mz nabzmu nzvz-nqblq-angidr-krmu natqdr, mz nzapu-krmu kxnzwztr-pzng mz Kraes, murde krlc me pnz drtwr Gct. ⁷ Abrtzlvzamu nzwz-krmu, na-apule kx wztrpzmu mz Kxetu, a' trngiu ncblo. ⁸ Nadcpz mz drtwrmu kx Kxetu sa na-ayzlumle nzwz-krqu kxmrlz mz da kxmrlz, kxmule-esz' nigu kxnzawzng o trtingr. ⁹ X nimu kxnzetung, kx namusr-kz-ngrnamu kxnzawz nemung lcpwz.

✧ **6:2-3** Nzrlaszng 20:12; Lou Kcpwz 5:16

Bzkq rpibzmu natq kx naxngitrir x natq ngr nzviplangr nidr. Nadcpz mz drtwrmu kx nimu badr Kxetu rmu esz' kc Heven, x mz nzobq-krde leplz amrlx kxnmzmu-tpwzlr esz'.

Dalr Vea Kx Kam Gct Bagu Mz Nzaovxio-krgr Setzn Badr Drka' Kztedeng

¹⁰ Natqngc kx nzrmnr-ngrbzng nidr seleng. Mnctr-amqngibzmu mz Kxetu rgu, murde narngiscmu zmatq mz nzaxplr-krde nimu. ¹¹ Vecku badr Setzn kc tqstuti drtwrde nzaovxio-krde nigu. Mz nmzmu-krde lcde, yrlqzbzmu dalr vea amrlx kcng tqkabz Gct bamu, murde natu-amqngi-ngrnamu mzli kc Setzn na-atalz-ngrde x naesabrti-ngrde nimu. ¹² Mz vea lc trveckuu badr leplz. A' vecku badr drka' kxnetung, kxnzrmailzng, x kxnzmatqng kcng tzmncng mrnyzdr. Murde sc tzrbatrpzng alwx x da kxtrka mz nrlc ka, mz nznrgisc-krdr zmatq kxdrka'ngr. ¹³ Mz nmzmu-krde lcde, mzli ka nayrlqzbzmu dalr vea amrlx kcng tqkabz Gct bamu, murde mzli kc navec-ngrgu badr, natu-pz'li-ngrnamu nidr. X natu-amqngiamu nakrlzlezle mzli kc nayrkrpxngr nzvecngr lc.

¹⁴ Oliqti-lz bqamu mz nzngini-krmu ncblo ngr vea neng Gct. Murde ncblo ngr vea nzamqngitrir nrkalodr, murde naoliqng mz nzvecngr. X mz nqm q lcpwz, nzkriz-krmu da angidrng amrlx kx nzvzpxmqng mz Gct na-apule nrkalomu, murde naoliqamu mz nzaovxio-krmu nzpokianger amrlx. X ncblo ngr vea nzyrlqzbzlr temz ngr lomrdr kc tqyrputrngr nipna, murde enqmi rdrng ma

tzluplxtrpzlr lomrdr. Mz nqm̄q lcpwz, nzkr̄lz-krmu kx tubqpebzmu mz nzobqkr Gct na-apule temz ngr lomrmu, murde Setzn ma tqbatrpzle nztalvzokr nabzmu, mzli kc tqrpi-ngrbzle bamu kx vz-rbramu. ✧ ¹⁵ X ncblo ngr vea nzyrlq-kzpzlr but ngr nanycdr, murde natu-amqngi-ngrdr mz mzli r vea. X mz nqm̄q lcpwz, nzkr̄lz-krmu kx mncamu mz nrw̄x badr Gct mz nzvz-nq̄blq-krde Nrpakxmrlz, na-apule but ngr nanycmu, murde natu-amqngiamu mz nzrlxngitikrmu x mz nzpipx-krbzmu Nrpakxmrlz badr leplz. ¹⁶ X ncblo ngr vea nzaotr-kzng mz mq̄dr kxmc da kxm̄qngi scdr kc tqyrputrngr nipna. Mz nqm̄q lcpwz nzbrtikr drtwrmu Jiszs, na-apule da kxm̄qngi scmu kc tqyrputrngr nipna kxngc kc tqpnzngr Setzn nimu mz nzatr̄kati-krde nimu. Murde nzbrtikr drtwrmu Jiszs sa na-amz-zvzbzle nipna kxngc sc Krkc Tqdrka'ngr amrlx. ¹⁷ X ncblo ngr vea nzyrlq-kzpzlr abx ngr vea kc tqayrbqpxle nardr. X nzm̄ale-kzlr toki r vea mz mq̄dr kxrtc mz nzvec-krdr badr enq̄mi rdrng. ✧ X mz nqm̄q lcpwz, nzkr̄lz-krmu kx Gct arlapxpele nimu na-apule da kxm̄qngi kx nalalvzle narmu, murde nzao-krmu drtwrmu natubq x naopx, murde ma tqesabrti Setzn nimu. X nzkr̄lz-krmu natq Gct x nzpipx-krbzmu na-apule toki r vea kc tqkabz Mq̄ngrkxtr, nangi dalr nzaovxio-krmu Setzn. ¹⁸ X mz nzvec-krmu, krka'-zvz-ngrbzmu mz Gct nzokatr-krde nimu. X mz da amrlx krka'-zvzamu navz-nq̄blqle kxmu nzpi-krbz Mq̄ngrkxtr le mz nabzmu. Mz nzkrka'-krmu aclvetio-angidramu, murde drtwrmu bzkq ma mz nzkrka'-krmu leplz

✧ **6:14** Asaea 59:17 ✧ **6:17** Asaea 59:17

neng Gct amrlx mrkang kqlu. X bzkq esaki nzkrka'-krmu, navz nakrlzbzle mzli kx ayzlu-ngrbz Gct natqmu.

¹⁹ X krka'-kz-ngrnamu ninge, murde nakam Gct bange natqdeng mzli kznike naycmne-ngrne, x nelznge nabr, mz nzyokaetipx-angidr-krbo Nrpakxmrlz kc tqyc-kapqbz mz leplz.

²⁰ Kraes aprcmle bange nzwzkr menrpa nede mz nzyapwxtipx-krbo natqdeng. Dekc tzadwatrpe-ngrne mz presin. A' krka'-ngrnamu ninge, murde napipx-angidrbo mz nelznge kxbr.

Natq Ngr Nzarlz-lzbqngr

²¹ Atwzlr-ngrbo bamu Tikikzs, mzlegu kxnm-rlzti, kx wztr-angidrzbz mz Kxetu rgu, murde nayapwxti-krlzpwzle ninge bamu x da kx rtrngztibong. ²² X na-apqtrpzle drtwrmu mz nzkrlz-krmu nrpa ngrgrng amrlx.

²³ Krka'-ngrne kx Trtegu Gct x Kxetu rgu Jiszs Kxnmcpx na-amnc-zpwxlr nimu badr mz nrw. X nabatrpzlr nzmrlzti-lzbq-krmu x nzbrti-zvzkr drtwrmu Kraes. ²⁴ X rlxti-kzpo mz Gct kx nakabzle zmrlz ngrde kxmyalz mz leplz amrlx kcng tzmrlztilr Kxetu rgu Jiszs Kxnmcpx mz nivz kc tqvztx alo.

Delape. Ninge *Pol*.

Nzryrngkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 21 Feb 2024 from source files dated 31 Aug 2023

fb2b7f06-e254-5fb7-b59d-ee21d5d7a93f